

# INUIT ATAQATIGIIT

## Inatsisartuni



4. Maj 2020

UPA 2020/45

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

**Kalaallit Nunaanni tamat oqartussaanerata innuttaasunillu peqataatsinerup killiffia naammaginartumik inissisimanersoq pillugu apeqquteqaat aallaavigalugu oqallinnissamik siunnersuut.**

(Inuit Ataqatigiit Inatsisartuni)

Nunatsinni inuit tamarmik oqartussaaqataanerat pisuussutaavoq naliitsoq, eriagisassarput. Tassaamat inuup ataatsip kisimi aqutsinani tamatta aqutseqatigiinnissatsinnik akisussaaqatigiinnitsinnillu tunngaviliisoq. Tamat oqartussaaqataanerat inuit ikinnerussuteqartut amerlanerussuteqartullu nunaminni naalakkersuinikkut ingerlaatsimi illersortissaat. Oqartussaaneg tunngavipput inuiattut kinaassuseraarput.

Aqutseriaatsip atukkatta kikkulluunniit aqutsisuugaluarpata nalilersortuarneqarnissaa pisariaqarpoq. Oqartussaaqatigiinnermi ingerlalluartoq inuiannullu iluaqutaasumik ineriartorfiusoq, imminut naalaarsinnaanermi tunngaveqarpoq. Ammasumik isummat aqutseriaatsimut inerisaataasinnaasut illersuutaasinnaasullu oqallisiginissaat inissaqartinneqartariaqarparput, anninneqarpata ajuallaatigiinnaqinagit.

Inuiattummi suleqatigiittussaanerput, immitsinnut naalaarsinnaanerput inuillu allat isumaannik ataqqinnillutalu suleqateqarsinnaanerput attattuaqqunaqaaq. Ammasumik ingerlatsilluni oqartussaaqatigiinneq matoqqasumillu ingerlatsilluni oqartussaaqatigiinneq assigiinneqaaq.

Tunngaviumik tamat oqartussaaqataanerat atuukkualuartoq, ukiuni kingullerni takuarput aamma malugaarput matoqqasumik aqutsinerup annertusigaluttuinnarnera. Oqartussaaqatigiinnerput erianartoq inuup ataatsip ikitsunnguilluunniit kisermaassiumaneratigut allatullu isumalinnik naalaarsinnaannginnerannit allanngortilluinnarneqarpoq.

Uppernarsaatissaqarluartunik.

Tusarniaasarnermi susassaartut isumaasa soqutigineerukkiartorneri. Kattuffiit ataqqineerukkiartuinnartut misiginermik saniatigut uppernarsarneqartumik aamma.

Inatsisartut Naalakkersuisunut piginnaatitsissuterpasut tunniussuuppaat, aamma aningaasaqarnerput eqqarsaatigalugu. Pissaanerup agguarneqarnera aallaavigalugu tamallu oqartussaanerit tunngavigalugu pissaanerit imminut nakkutigillutillu suleqatigiilluarnissaanik tunngaviit annikillisarnerput.

Tamanna kingullermik uppersivaput ulluni nualluussuup covid-19-ip imaannaanngitsorsortitsinerata annikillinerani illuatungiliuttut assamminnik isaassillutik Covid-19-ip aningaasatigut kingunissaat kingunerisaallu imaannaanngitsut pillugit nutaamik sinaakkusiinissamik Naalakkersuisunik suleqatiserinninnerisa Naalakkersuisunit tusaajumaneqannginnerat takutinneqarmat.

Nunanut allanut isumaqatigiissusiornerit malunnaatillit, ilaatigut illersornissamut tunngalluinnartut nunattalu nunanut allanut isumaqatigiissutaanut kallaararsinnaasut, suliat naammassigaangata Inatsisartunut ilisimatitsissutigilaaginngassat Naalakkersuisut isigilersimavaat. Kingullertut USA-mik isumaqatigiissusiorneq assersuutissaqqippoq. Naalakkersuisummi nunarput issittulerngusaanermut, nunat pissaanilissuit anneruniuninnerannut akuliutsippaat inuiaqatigiit sinnissaat annerusumik ilisimatinnagit. Siunertat isumaqatigiissutillu inuiaqatigiinnut qanoq malitseqarumaarnerat ammasumik oqallisigineqarnissaat Naalakkersuisut siuttuuffiginngilaat, siuttuuffigiumanagillu.

Suliat matoqqasumik isertuussanngorlugit Naalakkersuisunit ingerlanneqarnerat annertusiartuinnartumik atornerqalerpoq. Uffa suliat nunatsinni isertuunneqartut ilarparujussui nunani allani naalagaaffeqatitsinnillu ammasumik oqallisigineqartut. USA-mik ippassaaniinnannguaq isumaqatigiissuteqarneq assersuutissatsialaavoq. Naalakkersuisut isertuussanik Inatsisartunut saqqummiussisut, Naalakkersuisut nuna atsioqataaffigisaasa aningaasat qanoq amerlatigisut, sumut qanorlu atornerqassanersut saqqummiukkaat danskit nutaarsiassaqartitsiviisa ilaannit paasigatsigu. Siullermiilngilaq Inatsisartut Naalakkersuisunit taamak pineqarnerat. Pissutsit taamaattut Inatsisartoqarnermut nikanarsaanerupput aallaallu Inatsisartut isummernaveersaartinniarlugit nipangersaaniarnertut taaneqarsinnaallutik.

Inuit nunatsinni akaareqatigiinnerat, ersoqatigiinnerat paaseqatigiinnissamillu siunnerfeqarluni naalakkersuinikkut ingerlaaseqarnerat oqaluttuaannanngulersimavoq. Tamatta annerusumik minnerusumillu pilersitseqataaffigisatsinnik.

Nunatsinni inuppassuit ippigaat, avoqqaaraat aaqiisoqarnissaanillu noqqaasut tusarsaajuaput. Naligisatut isigineqarneq, naalakkersuinermi sunniuteqaqataaneq, tusaaneqarneq, erseqqissumillu toqqississutigisaminnik nassuiaanneqarneq inuiaat maqaasivaat.

Oqartussaaqatigiilluni ammasumik aqutsineq maqaasivaat.

Inuit Ataqatigiit isumaqarput killiffipput naammagiinnarlugu ineriartornavianninnatta pisussaaffigigipput nunatsinni tamat oqartussaaqataanerata nukittorsartariaqalersoq. Oqartussaaqatigiinneq inuiannit sunniuteqarfigineqarluarluni malugineqarsinnaasumik ineriartortittariaqalerparput.

Oqallisissaq manna qaqipparput partiit maannakkut tamat oqartussaaqataanerata pillugu naliliinerat tusarusukkatsigu.

**Tamat oqartussaanerat innuttaasunillu peqataatitsinerup killiffia naammaginartumik inissisimava?**

Inuit Ataqatigiinniit oqaatigeqqissavarput naalakkersuinikkut nunamik aqutsinermi tamat oqartussaanerata tunngavigineqarnera ullut tamaasa sorsuutigigatsigu. Tamat oqartussaanerat tassaavoq aalajangikkat pillugit ammasumik tunngavilersuisinnaaneq, illersuisinnaaneq, siunnerfiliisinnaaneq akisussaaffimmillu tigusineq. Qunusuilluni innuttaasut isaasitigut qiviarsinnaanerata, isertugaqarnani ilumoornerlu tunngavigalugu. Inuiaqatigiit pillugit maani suligatta.

Qujanaq.